



UPM Ungguli Pertandingan Debat Diraja MADUM



Pasukan debat Kategori Utama A dan pasukan debat Kategori Muda B bergambar selepas memenangi Pertandingan Debat DiRaja 2008.

GOMBAK, 4 Dis – Pasukan debat Universiti Putra Malaysia (UPM) menjuarai Kategori Utama dan memenangi Naib Johan Kategori Muda Pertandingan Debat DiRaja antara Universiti Awam Malaysia (MADUM) 2008 baru-baru ini.

UPM membariskan pendebat pasukan Kategori Utama, Mohd Syamsul Salleh, Ammar Redza Ahmad Rizal, Amirrudin Abd Rahman dan Nurul Syafiqah Ahmad Shokhaily selaku barisan kerajaan berjaya menewaskan pasukan debat dari Universiti Islam Antarabangsa Malaysia (UIAM) dengan tajuk 'Rumah Putih Cuma Bertukar Warna'.

Sementara itu, pasukan Kategori Muda UPM dianggotai oleh Nor Fara Syazwani Jufrin, Muhammad Badri Ishak, Norlida Idrus dan Norazwin Shajudeen selaku pembangkang telah mendapat Naib Johan bagi kategori tersebut.

Pertandingan debat tersebut menghimpunkan peserta-peserta dari 23 buah Institusi Pendidikan Tinggi Awam (IPTA) melibatkan 63 pasukan menyampaikan hujah mengenai isu-isu semasa.

Pendebat UPM, Amirrudin Abd Rahman berkata mereka berlatih dan mencari maklumat secara bersama selama tiga minggu melalui akhbar, internet, majalah dan sentiasa membuat perbincangan strategi bagi memastikan hujah yang disampaikan bernas.

"Kami korbankan masa 16 jam sehari selama tiga minggu bagi memastikan kejayaan ini dapat dikecapi bersama.

"Pengalaman sebelum ini banyak membantu kami dengan membuat persiapan yang lebih rapi dengan pendedahan bengkel serta latihan yang lebih berkesan," katanya ketika dihubungi.

Pendebat UPM Amirrudin Abd Rahman dan Nor Fara Syazwani Jufrin merangkul Anugerah Pendebat Terbaik pusingan akhir masing-masing untuk Kategori Utama Bahasa Melayu dan Kategori Muda Bahasa Melayu.

Hadiah disampaikan oleh Presiden UIAM, Tan Sri Mohd Sidek Hassan kepada pemenang.

Bagi Johan Kategori Utama, UPM membawa pulang wang iringan RM5 ribu, piala pusingan, piala iringan, piala individu dan sijil penyertaan.

Naib Johan Kategori Muda, UPM menerima hadiah RM3 ribu, piala iringan, piala individu dan sijil penyertaan sementara itu pendebat terbaik mendapat RM2 ratus dan piala iringan.



Amirrudin Abd Rahman dari UPM memenangi Anugerah Pendebat Terbaik Kategori Utama Bahasa Melayu.

Disediakan oleh Seksyen Media, Bahagian Komunikasi Korporat UPM.